




Canadian Open: Rybakina-i Osaka koka semifinal tongtetogo

EU-i ozü rong dak tenük yokra onokia kasaji inyaktsü: Putin



JPC nem FCRA Bill asadangtsü agütsüba atema pelar: NEICC

Dimapur, August 12, 2026 (TYO): India sorkari Joint Parliamentary Committee (JPC) ka nem Foreign Contribution (Regulation) Amendment Bill, 2026 jungjunga asadangtsü lemtetba pelashishia agizüker ta North East India Christian Council (NEICC)-i metetdaksüogo.

Union Home Minister Amit Shah-i Khristan tamangertem aser tanga sendaktepa alirtemi ashiba tebilemtsütem angatetba aser parliamentary maparen ajanga iba Bill asadangtsü melaba atema kanga pelar. Iba ya democratic maparen nung kanga dang tongtipang mera ka lir ama bilemer ta NEICC-i sangdong ka nung ashi.

JPC ajanga Bill nung temelenshi alibatem jungjunga asadangtsü aser sendaktepa alir ajak indang tangatetba angadangtsü imlar. Khristan tamangertemi ochishiba, tenüng agiba aser linük nung ozüngtem sülen anidaktsü tenangzükba nung noktaka lir, kasa mapang

onoki loktiliba tenzükba rejutem asoshi legal framework tim aser inyaktetba aginür ta NEICC-isa ashi.

Meghalaya Chief Minister Conrad K. Sangma, Mizoram Chief Minister Lalduhoma aser Nagaland Chief Minister Neiphiu Rio nungeri nübortem tebilemtsü angateta Centre sorkar den iba tebilemtsü abenba atema tenüngsang agütsür. Parnok dak alia Member of Parliament tem aser public lennirtemi iba onok pusema nungitba aser yaritepba atema kanga pelar ta NEICC-isa metetdaksüogo.

North East, India aser alima balala nung arogo lennirtem, arogopurtem aser Khristan tamangertemi sarasademtsüba aser pusema nungitba atema pelar. Tang mapang ya asenoki maneni sarasademtsüla, shisatsü meshitsüla aser tebilemtsü khuret angateta inyaktsü nüngdaker. NEICC-i olemtep tajung alitsü tangatetba nung noktaka lir aser parliamentary maparen nung shilem agitsü ta parnokisa ashi.

Manipur CM-i anogo 15 tsüngda prangpongtem agütsütsü tuyur

Imphal, August 12, 2026 (Agencies): Manipur Chief Minister Yumnam Khemchand Singh-i August 12 nü anogo 15 tsüngda ozüng alema prangpong ajak bendanga agütsütsü mapang züngzüksüogo.

1st Battalion Manipur Rifles Parade Ground, Imphal nung "Display on the Initiatives towards bringing Normalcy in Manipur" sentong nung jembidang CM Khemchand-i tashi mangartem ozüng tapet agi merenshitsü metetdaksüogo.

Manipur nung hills aser valley nung prangpong ajak local MLA tem mesüra pei pei Superintendents of Police ajanga bendanga agütsütsüla. Anogo 15 tsüngda prangpong magütsürtem dak ozüng agi merenshitsü ta pai ashi.

February 4, 2026 nungi Chief Minister Khemchand-i aniba sorkar kümteter arudang security tensa meyipa reprangshia liasü.

Manipur Police, Central Armed Police Forces, Army, Assam Rifles aser tanga security agencies külemi inyaka arudang February aser August tsüngda firearms 1,422, 7,000 rounds of ammunition aser 1,137 explosives puogo.

Kasa mapang security forces-i telungpur 491 apu aser lanurtem drug nungi kümzuka ayutsü meranga anti-narcotics operations tuluba inyakogo.

May 3, 2023 nungi Manipur nung mepetmesü adoka tensa raksaba ajanga state renlokba maparen nung kongshiogo. President's Rule mapang stabilisation measures inyakogo aser iba ajanga yimjung maparen inyaktsü lenmangtem lapoktsü ta Chief Minister Khemchand-i ashi.

Tawa pai Jiribam semdangdang Hmar, Paite, Meitei aser Meitei Pangal nunger den külemi chiyungtep aser iba ya telok balala tsüngda temulung lemtep adoktsü merangba nung shilem ka lir ta paisa ashi.

Director General of Police Mukesh Singh dena Manipur nung security lenisüba ajanga prangpong-injang aika ngutetba aser sayuba atema tenüngsang agütsür ta CM Khemchand-isa ashi.

Home Minister Govindas Konthoujam-ia National Highways nung senzüba transporters dang tashiyim agi sen meshiba, amokmerenba mesüra timtem agütsüba magizüker ta metetdaksüogo.

Sorkari ibala mapa inyakterem dak ozüng tesashi agi merenshitsü aser highway meinpronger dak National Security Act (NSA) benoktsü ta Konthoujam-isa ashi.

Iba sentong nung Deputy Chief Minister Losii Dikho, cabinet minister tem, sorkar aser police ketdangsürtem aden.

NSF & AKM-i kaketshirtem I-Day nung shilem magitsü tuyur

Dimapur, August 12, 2026 (TYO): Naga Students' Federation (NSF) aser Ao Kaketshir Mungdang (AKM)-i sangdong balala ajanga school aser shisaliok rejutem dang Indian Independence Day nung kaketshirtem shinga shilem magitsü tetuyuba agütsüogo.

Vande Mataram atemtsü mesüra atentsü ozüng agütsüba atema NSF aser AKM-i iba tetuyuba agütsüogo.

NSF-i August 12, 2026 nü sangdong ka nung federating units aser subordinate bodies dang 'official functions' nung revised Vande Mataram atemtsü mesüra atentsü tetuyuba magien tashi Independence Day sentongtem nung school mesüra shialiok rejutemi kaketshirtem medendaktsütsü tetuyuba

agütsüogo.

Iba tetuyuba ya Independence Day amungba mesüra National Flag, National Anthem aser tanga national symbols akhümtsübuba anema masü saka Vande Mataram compulsory shilem agidaktsüba anema lir, kechiyong iba ken ya non-Hindu nunger mulungsentsü aser tangatetba den meputep ta NSF-i metetdaksüogo.

Kaketshir shinga nem tamangba yimsü dak sendakba mapa nung shilem magidaktsütsüla aser iba ya Freedom of Conscience and Religion aser Article 371A ajanga metentsür. Onoki tesüiba nunga Ministry of Home Affairs den January 28, 2026 den iba tebilemtsü onük lemsatepogo ta NSF-isa ashi.

NSF-isa mulungsentsü mesüra tamangba yimsü tangatetba nung shilem magiba kaketshirtem dak 'disciplinary action, discrimination, intimidation mesüra academic consequences' malitsüla ta tetuyuba agütsüogo.

Külen, AKM-ia tanga sangdong ka nung Mokokchung telongtet nung school aser shisaliok rejutemi August 15 benjungmung nung kaketshirtem medendaktsütsü tetuyuba agütsüogo.

AKM-i mandatory Vande Mataram tetuyuba aser kaketshirtem Freedom of Conscience and Religious belief tangatetba nung iba tetuyuba agütsüogo aser shisaliok reju ajaki tashi angatsü metetdaksüogo.

NSDMA-i Chümoukedima SASCI works indang jangjatsür

Dimapur, August 12, 2026 (TYO): Nagaland State Disaster Management Authority (NSDMA)-i Chumoukedima nung Special Assistance to States for Capital Investment (SASCI) ajanga inyakba mapatemji river erosion protection atema masü saka tzümetsüng agi raksatsüba infrastructure aser flash-flood mitigation atema liasü ta jangjatsüogo.

Media aser social media kar nung osangtsüsang meshitak prokshiba ajanga Diphupar A aser Seithekhiema tesemtem nung terata adokdaksüba agi jangjashitsür ta NSDMA-i ashi.

Diphupar A Gate nungi K Khel, Diphupar A tashi flood-damaged infrastructure renemogo. Ano, Diphupar K Khel nungi Airport Road den sendaktepba lenmang

nung flash-flood mitigation mapa renemogo aser Naga United Village, Ruve Khel nungi Seithekhiema Basa tashi flash-flood mitigation work renemogo ta NSDMA-i metetdaksü.

Item mapatong asem ya tzümetsüng ajanga kongshiba village road infrastructure yanglushitsü aser ajungben tzümetsüng nungi kümzuka ayutsü mapa inyaktsü atema senotsü lemmüksüba liasü. Item mapatong ya river erosion mitigation projects ama agütsüba masü ta NSDMA-isa jangjashitsüogo.

NSDMA-isa item mapatongtem ya nija mesüra contractor shinga nem-a contracts magütsü saka department-i dang inyakba jangjatsüogo.

Chumoukedima aser temeket

nung ayongtzü agi ali anenzuka bener aoba khuret meteta lir saka comprehensive river erosion mitigation atema inyakyim balaka nüngdaker ta NSDMA-isa metetdaksüogo.

Taoba nung Post Disaster Needs Assessment (PDNA) kübok dang river erosion mitigation maparen agüja liasü aser iba asoshi Ministry of Home Affairs, Government of India den jembidar ta NSDMA-isa ashi.

NSDMA-isa media teloktem aser social media amshirtem dang osangtsüsang meproksheidang tamasa mapa lemmüksüba osang tejangja jangjateptsü mepishiogo. Osang tai prokshiba ajanga public rongnung mangatettep mesüra shisabulu adokdaksütsü akok ta parnokisa shiogo.

MP Supongmeren-i Doordarshan Nagaland indang tebilemtsü lemsatep

Dimapur, August 12, 2026 (TYO): Lok Sabha MP S. Supongmeren Jamir-i Prasar Bharati (Doordarshan), Nagaland kübok inyakba contractual employees indang tebilemtsü lemsatepogo.

MP Supongmeren-i Union Minister for Information & Broadcasting, Railways and Electronics & Information Technology Ashwini Vaishnaw dangi iba asoshi shidi ka zülüogo.

Iba shidi nung Doordarshan, Nagaland nung Engineering aser Programme Sections nung contractual employees indang tebilemtsütem lemsatapa lir.

Tang teinyakdak contractual employees ya public advertisement aser interviews ajanga shimokba lir aser parnok nem regular staff-i inyakba kasa

mapa lemmüksü lir. Parnoki technical maintenance, studio operations, transmission aser programme execution maparen inyaker aser item ajak ya kanga tongtipang ta MP Supongmeren-i ashi.

Parnok nem lemmüksüba mapa nendaka aser bendanga agüja inyakaka job security mangur, structured pay system mali aser basic service benefits mangur. Anungji Union Minister-i humanitarian grounds nung angateta yaritsü ayongzükur ta pai shidi nung shia lir.

Prasar Bharati (Doordarshan), Nagaland nung contractual employees-i ajangshia aruba aser mapa inyaka aruba nung ajemdaker regularisation/absorption atema policy ka renemtsüla. Maneni 'equal pay for

equal work' tangatetba nung pay structure timi latettsü ayongzükur ta Supongmeren-i Union Minister Ashwini Vaishnaw dang mepishiogo.

Paisa contractual employees atema job security agütsütsü aser EPF, medical facilities & leave provisions dena basic service benefits agütsütsü ayongzükogo.

Nagaland nung Engineering aser Programme Sections nung special recruitment ka alitsüla kechiyong Doordarshan nung nübo tashi itshitsü nüngdaker ta Supongmeren-isa ashi.

Union Ministry-i iba onük ya rongdak ta angateta Nagaland nung Prasar Bharati kübok Doordarshan tiptema inyaka aotsü atema meratem agitsü imlar ta paisa Union Minister dang shiogo.

JMC aser DISHA lungjemer International Youth Day amung



Dimapur, Luroi/August 12 (TYO): Jubilee Memorial College (JMC) ajanga District Integrated Strategy for HIV/AIDS (DISHA) den lungjemer college indang Red Ribbon Club den külemi college campus nung August 12, 2026 nü "Different Contexts, Common Aspirations" omen kübok International Youth Day munga liasü.

Sentong nung Nungshiwapang, Semester I, menden liasü aser college Principal, Dr. Imtiwati Jamir-i pela agizükba o jembi. Iba

sentong nung Liju Achumi, Semester V, ajanga temeja ken ka aten aser Elocution Competition nung takok angur temi presentation ka agi shilem agia liasü.

Iba sentong nung akakteta jaoker, Kewimesin Nriame, EAC Mokochung ajanga lanurtem ajungmesoa o jembia liasü. Lai kaketshirtem dang pei dak aliba sempet tajungtiba temai adoktsü asoshi mangdang tajung akaba tembartem alitsü tongtipang lir ta ashi aser social media kanga kumdanga amshitsü ayongzüka liasü.

Lai kaketshirtem lokti indang masü saka pei mangdang arishitsü ajungmeso, mepaidoktetba tamakok ajurutsü renema alitsü aser kodanga lulaa melie meranga inyaka tajung akumtsü ajungmeso.

Laisa lanurtem pei tera den sendaktepa alitsü atema local arts aser crafts tem mesamadaktsütsü ashi.

Iba sentong tembanga Dr. Chubaienla Imchen, Nodal Officer, JMC Red Ribbon Club ajanga melepzüng o jembi aser iba sülen alaketa jaokeri "Youth on Wheels" tenzüka liasü.

Nagaland nung kaket reju ajunga nung BBSC ayongzüksü tuyur

Dimapur, Luroi/August 12 (TYO): Directorate of School Education, Nagaland ajanga state nung aliba school ajunga dang August 10-18, 2026 anogotem Bharatiya Bhasha Summer Camp (BBSC) 2026 ayongzüksü totuyuba agütsüogo.

Districts ajunga nung District Education Officers aser Sub-Divisional Education Officers tem dangi osang yokba nung, Department of School Education and Literacy, Ministry of Education nungi April 27, 2026 nü totuyuba agütsüba den lirumedema iba camp ya ayongzüksü, ta Directorate ajanga ashi.

Asayamenü aser sensaksemba yimyatam amshia kaketshir nem India indang oshi balala metetdaktsütsü nükjidong nung BBSC ya ayongzüker alitsü. Iba camp mapang India nung oshi balala nung salem shitepba aser lemsatepba, pei sasa metetpelaba, asüngdangyaba aser vocabulary-building sessions

tem alitsü.

Taküm tongtipang inyakyim ka bendenlokbaji curriculum nung shilem ka ama Indian Sign Language (ISL) inoksemba ya alitsü, koba ajanga ajak nem shisaliok agütsütsü tebilemba nung lir ta ketdangsürtemi ashir.

Iba component ya yaritsü atema ISL indang reference video pongu school tem nem email ajanga BBSC mapang agütsütsü. School tem dang taoba küm amshiba resource publication "A Language Learning Resource Book for Bharatiya Bhasha Summer Camps" ya supplementary material ama amshitsü ashi.

Directorate ajanga shilem agiba school ajunga dang camp inyangsangshi noksa aser video tangoktsü aser nagalandbbbsc@gmail.com nem agütsütsü metetdaktsü. District aser sub-divisional officers tem dang iba sangdong ya school heads ajunga tongja shilem agidaktsütsü aser activity report ya August 21 tashinung agütsütsü metetdaktsüogo.

Chümoukedima nung HIV & STIs indang IEC campaign tenzü

Dimapur, Luroi/August 12 (TYO): Minister, Health & Family Welfare, Government of Nagaland, P. Paiwang Konyak-i August 12, 2026 nü Agri Expo, 4th Mile, Chümoukedima nung HIV and Sexually Transmitted Infections (STIs) indang Intensified Information, Education and Communication (IEC) Campaign round tasembuba tenzüka liasü.

Iba sentong ya Nagaland State AIDS Control Society (NSACS) ajanga National AIDS Control Organisation (NACO) kübok ayongzüker aser state tesem ajunga nung HIV aser STIs indang awareness tashi itshitsü, item tashidak nungi jenbua alitsü aser keraa tendangtsü ajungmesotsü, mesü-mokonga aser bensaa amshiba samadaktsütsü aser health services tajungba kumdaktsütsüsa yanglua lir.

Sentong akhumdong ama Minister, Health & Family Welfare, P. Paiwang Konyak-i iba sentong nung jembidang, International Youth Day nung iba campaign tenzüka ya Nagaland nung nüburtem indang health, akhum aser tarutsü tia wazüka ayutsü asoshi ajaki bendanga agütsütsü asoshi akangshitsü maongka lir, ta ashi.

Lanurtem ya tarutsü indang lenirtem kija masü saka tanü tendak yanglushitsü asoshi tongtipang 'partners' lir, anungji parnok indang health, shisatsü aser tashi nung rongsen indoktsü nüngdaker, ta pai ashi.

Minister Paiwang-i State nung HIV tensa indang lemsatep aser Nagaland nung HIV tebilemtsü kanga lir saka kasamapang jenbua aliba, tendangba aser treatment nung



P. Paiwang Konyak

terenlok lir ta ashi.

2010 sülen Nagaland nung HIV infection tasen shilem 39.97 agi ajemogo aser AIDS dak sendakba nung asüba shilem 80.21 agi ajemogo, ta pai ashi. Iba terenlok ya ajanga kumzüka ayuba, keraa tashidak putetba aser temang shidak anepaluba ajanga tepila tulu adokdaktsüba sayur, ta ashi.

NACO HIV Estimation 2025 athishia jembidang, districts shia HIV prevalence balala lir, anungji pei den apet mera agitsü nüngdaker, ta Minister-i ashi. Pai Government of India aser NACO lenisüba aser teyaritep asoshi tenüngsang agütsü aser Mobilization for AIDS Suraksha (MAS) ajanga district shia kuli tejangja nung ajemdaker tajangzüker angutsüsa inyakyimtsü lenmang sayur, ta ashi.

Iba campaign mezüng rounds ana mapang yimtsüng balala nung senden 1,300 dak tali menogo, schools 1,000 aser colleges 200 dak tema nung sentong balala ayongzükgogo aser kibong 7,600 dak tema semdanga awareness agütsüogo

aser nisung lakh ana dak tema den indang-indanga inyangsangshia aruogo, ta pai ashi, Ajisüaka round tasembuba ya maparen balala inyaka ajanga masü saka nüburtemi tendangtsü aser treatment atema aruba, mesü-mokonga aser bensaa amshiba ajema akumba nung asadangtsü, ta Minister Paiwang-isa ashi.

Pai lanurtem dang osang tejangja meteta alitsü, mashisa aliba tetsürtem temang tendangtsü ayongzüker aser district administrations, healthcare workers, community leaders, arogo, kaket reju, civil society organisations, NGOs aser nüburtem dang iba campaign nung kibur kuma teka amteper inyaksü ayongzüka liasü.

Secretary, Health & Family Welfare, S. Tainiu, NCS ajanga iba sentong ayongzükerba nükjidong lemsatepa liasü aser Principal Director, Health & Family Welfare, Dr. Mereninla Senlem aser Deputy Commissioner, Dimapur. Dr. Tinojongshi Chang, NCS nungeria o tatsütsü jembia liasü. Sentong tenzüka Dr. S. Manyau Phom, Project Director, NSACS ajanga pela agizükba o jembi.

Iba sentong tembangba sülen Minister-i Intensified IEC Campaign 2026 Bike Rally tenzüksü, kong bikers 25-i HIV aser STI awareness agüja jajatsü.

Niuland, Tseminyu, Tuensang, Mokochung district kübok Longchem aser Mon district kübok Tobu nung HIV dak sendakba services tashi itshitsü atema Health on Bike outreach motorbikes tasen pongu semzüka liasü.

Angh-i Good Samaritan Senior Citizen's Home semdang

Dimapur, Luroi/August 12 (TYO): Nagaland Angh Nand Kishor Yadav-i August 12, 2026 nü Meriema, Kohima nung aliba Good Samaritan Senior Citizen's Home semdanga liasü.

Iba mapang Angh-i yangji aliba teintet rogotem den mapang indoka liasü. Iba ya ajanga pai teintet rogotem asoshi bilemstüba aser teintet rogotem anepalua amshitsü, azüngmeyaka metoktsütsü aser yaritsü tongtipang ta sayua liasü.

Pai yangji alirtem asoshi teyari balala agüja liasü.

Iba mapang Chairperson, Good Samaritan Women Society, Neithonuo Liegise-i iba

project indang otsü tongmelang agi lemsatep aser Old Age Home atema tarutsü mangdang aser sentong tem Angh den lemsatepa liasü.

Angh-i item mangdang aser inyakyim asoshi Society nem tenüngsang agüja liasü. Iba mapang Angh-i yangji alirtem den sensaksem tajung kaa liasü.

Sentong nung Juliana, Executive Member, Good Samaritan Women Society ajanga pela agizükba o jembi aser Kuolachalie Seyie, President, Naga Club ajanga sarasadem. Maneni Good Samaritan Senior Citizen's Home nung aliba teintet rogo temia temeja ken ka tena liasü.

PCC(A-N)-i Tizit aser Naginimora nung timtemertem semdang



Dimapur, August 12 (TYO): Tizit aser Naginimora nung tawa tzümetsüng agi timtem takoksa ajurur alirtem ajurua parnok timtem lemsateptsü asoshi yashi Luroi (August) 11 nü Border Peace Coordination Committee (Assam-Nagaland) purtem den külem ser Mokochung District Head of Officers, Mokochung Chamber of Commerce & Industry, yimtak yimtsüngtem nungi yimsüsürtem. Arogotem, JATTT, TATT, Tuensang Town Baptist Church, Union Bank Regional Office, Jorhat aser teyaritepertemi parnok alidak tesemtem tonga oagi

semdangogo. Iba mapang nung Administrative officials aser mulungtet teloktema parnok den dena liasü.

Item takoksa aser timtem tulu ajururtem den ajurutepa ariabilem o lemsatepba den külemi, parnok nüngdaktem kar, kambol, towel, tetsür aser tanur süoshi, T-Shirts, telong sü, baltin, chipo aonpo, temo milen, merila mozü, phenyl, bleaching powder aser tzü tajemtsü kibong noklang ka shi nem lema agüja liasü ta BPCC(A-N) Coordinator, Er. Tamsü Wathu Ao-I sangdong ka nung metetdaktsü.



August 12, 2026 nü New Delhi nung Rajya Sabha nung opposition lenir Mallikarjun Kharge, Congress MP Priyanka Gandhi Vadra, Samajwadi Party MP Awadhesh Prasad aser tangartemi Ayodhya nung Ram tekülem ki tenla auyaba anema longkak aitba noksa nung angur.

Joint Parliamentary Committee ka nem FCRA Bill agütsüogo

New Delhi, Luroi/August 12 (Agencies): Bodhbarnü Parliament nung Centre sorkari benokba ama Foreign Contribution (Regulation) Act (FCRA) Amendment Bill ya Joint Parliamentary Committee (JPC) ka nem agütsüogo.

Lok Sabha senden nung Union Minister Nityanand Rai-i iba bill ya Joint Parliamentary Committee ka nem agütsütsü benoka liasü.

"Foreign Contribution (Regulation) Amendment Bill, 2026 ya iba House nung züngsem 21-i akümba Joint Committee ka nem agütsütsüla; züngsemtemji Lok Sabha Speaker-i shimtsüla aser Rajya Sabha nunga Chairman-i züngsem 10 shimtsüla," ta minister-i metetdakja liasü.

Lok Sabha Supplementary List of Business sasep nung Joint Committee nung züngsem

31 ji Lok Sabha nungi 21 aser Rajya Sabha nungi züngsem 10 asütsüla.

Committee jagi iba bill ya jungjunga asadangsü, iba sülen taküm asükwa mongpu Parliament senden tenzükba sülen mezüngbuba hopta tatembangbuba anogo nung Parliament nem iba report ji agütsütsü.

Sorkari iba Bill ya JPC nem agütsütsü atema benokba ama agizükogo, ajisüaka Congress-ibo maneni iba bill ya khenyongi agientsüla, ta akhanger.

Opposition-i, iba bill ya melungtet teloktem aser nütsüng ajema aliba rejutem anema lir, ta ashir.

Congress MP KC Venugopal-i iba bill ya agientsüla ta ashir aser Samajwadi Party MP Akhilesh Yadav-ia pa pusema liasü.

Ibaji langzúa Parliamentary

affairs minister Kiren Rijiju-i, sorkari iba bill ya JPC nem agütsütsü atema benokbaji opposition-i pelaa agizüktsüla, ta ashir.

Paisa, iba bill nung nütsüng ajema aliba rejutem anema kecha mali, ta ashir.

Foreign Contribution (Regulation) Amendment Bill, 2026 ya mezüng taküm March 25 nü Lok Sabha nung benoka liasü aser tang JPC nem agütsür.

Tzüngluruwa mongpu Parliament senden ya July 20 nü tenzükba liasü aser August 13 nü tembangtsü. NEET paper leak asüba, longkak aiter kaketshirtem dak police-i tashiyim amshiba aser Ayodhya nung Ram tekülem ki tenla auyaba onüktem nung opposition-i longkak aita yimyim ayimba ajanga senden junga magiteti aruogo.

Kobi melii Jantar Mantar season 2 tenzüktsü: Abhijeet Dipke

New Delhi, Luroi/August 12 (Agencies): Anogo 37 tashi Delhi nung longkak aita aruba sülen Union Education Minister Dharmendra Pradhan-i menden nungi anenogo aser maneni Cockroach Janata Party (CJP) tentetsang, Abhijeet Dipke-i, kobi melii Jantar Mantar Season 2 tenzüktsü, ta metetdaksüogo.

Nüburtemi social media nung takhangba sashia agütsüba nung ajemdaker CJP-i linük tesem ajaklen longkak aittsü telemtetba agi.

"Nisung aikati Instagram

ajanga, 'Jantar-Mantar Season 2 kodang tenzüktsü? ta asüngdang. Ni parnok dang ya shiner- 'Jantar-Mantar' Season 2 ji kobi melii tenzüktsü," ta pai ashir.

Cockroach Janta Party (CJP) lenirisa, "Tanü onoki Delhi nung volunteers' senden ayongzükba akatsü tebilemba liasü. Onoki hall ka bushir saka shingaia magütsür. Temaba menden nungi terongshiba lir ta ajaki ashir," ta pai metetdaksü.

Dipke-i, terongshiba liaka party-i campaign maneni

akatsü, ta ashir.

"Item ajak ya BJP mapa lir. Parnok mapa aser o ajanga parnoki linük nung lanurtem tsübuba kuli sayur. Item ama tilateri mapa ajanga onok tsübutsü, ta parnoki bilema lira ibaji khenyongi tai," ta paisa metetdaksü.

CJP otongdar Saurav Das-ia, longkak aitba tanabuba shilemjibo Delhi adener tesem ajaklen asütsü; nüburtem tebilemtsü onük angadangsü atema CJP-i linük tesem ajak sema senzütsü, ta metetdaksü.



August 12, 2026 nü Mumbai nung anentsüh lendong atalokba sülen sepaitemi kümzükba maparen inyakba noksa nung angur. Iba lendong nung nisung trok asü aser pezü yiru.

Himachal Pradesh nung tzünglu dak sendakba lendong nung nisung 70 süogo

Shimla, August 12 (Agencies): Himachal Pradesh nung tesüiba anogo 43 tsüngda tzünglu dak sendakba lendong balala nung nisung 70 süogo, gari lenmang 204 nokdangogo aser sen crore 910 jenjang kiojen raksaago, ta State Emergency Operation Centre (SEOC)-i metetdaksü.

Taküm June 30 nungi August 11 tashi nung tzünglu kanga aruba ajanga anentsüh aser tzümetsüng lendong densema lendong balala atalokogo.

June 30 nungi tenzükba tang tashi nung tzünglu dak sendakba lendong balala nung nisung 70 süogo; anentsüh lendong nung nisung 14 asü, lungren nungi tsükba mesüra süngdong nungi tsükba lendong nung nisung 23 asü, peri mechiba lendong nung nisung tenet asü, nisung trok electric ajanga pusea asü aser nisung pezü tsüingi lendong nung asü.

Lahaul & Spiti nung nisung teimba (14) asü aser Kangra nunga nisung 12 asü.

Kasa mapang nung gari lendong nung nisung 93 süogo;

Chamba nung nisung 16 asü, Kullu nung 13, Sirmaur nung 12 aser Shimla nung nisung 11 asü.


Tzünglu dak sendakba lendong balala nung kiojen raksaba ajanga sen crore 910.35 jenjang takoksa nguogo. Public Works Department sen crore 686.36 takoksa angu aser power sector nung sen crore 203.90 takoksa angu.

Tzüngluruwa mongpu nungsa district 12 nung nija kiojen aika raksatsü, kiset shiruru aika sama aser alu nung aonsotsü aika raksatsüogo.

Mandi nung gari lenmang 80 nokdanga lir, Kullu nung gari lenmang 56 aser Sirmaur nung gari lenmang 23 nokdanga lir. Iba dak alia national highways ana- NH-154 aser NH-21 nata nokdanga lir.

Gari lenmang aika nokdanga aliba ajanga osettsüset aser aonsotsü supply kongshia nisung aikati timtem kanga ajangshidar.

Tang state nung distribution transformer 45 raksaa lir aser drinking water supply schemes 82 mejungi kongshiogo.



August 12, 2026 nü New Delhi nung Ato kilonser Narendra Modi aser taoba Tir, Ram Nath Kovind na 'Triumph of the Indian Republic: My Life, My Struggles' kakat sayaba sentong nung tangokba noksa nung angur. Iba kakat ya Kovind taküm otsü kakat lir.

Punjab sorkari yimtsüngtem nung solar lights lakh 3 inoktsütsü

Chandigarh, August 12 (Agencies): Punjab sorkari yimtsüngtem nung LED-based solar streetlight lakh 3 inoktsütsü, aser iba nungji sen crore 470 adoktsü, ta Bodhbarnü New & Renewable Energy Sources Minister, Aman Arora-i metetdaksü.

Clean energy tesangwa ajanga nüburtem kümzükba alitsü aser connectivity tajungba akümtsü nükjidong nung solar light inoktsütsü.

Arora-i, iba project nung senotsü shilem 70 AAP sorkari inoktsütsü aser tanüngba shilem 30 ji gram panchayats-i agütsütsü, ta metetdaksü.

Paisa, mezüngbo senotsü tsükba shilemji 30:70 (sorkar shilem 30 aser panchayats shilem 70) liasü, aser ibaji ajanga yimtsüngtem nem senotsü khuret tali agüja liasü, ta ashir.

Panchayats ket nung senotsü peria mali, iba denji külemi gram panchayats ajak

nem shilem agidakja kasa maongka agütsütsü nükjidong nung sorkari iba telemtetba ya agi, ta paisa metetdaksü.

Arora-i, Punjab nung nütsüng shilem 62.51 (nisung lakh 173.20) bo yimtsüngtem nung aliba nüburtem lir, aser yimtsüngtem nung aonung lenmang nung tesangwa peria maliba ajanga lendong kanga ataloker aser ozüng alema inyakba kanga bulua akümer, ta ashir.

Iba project ajanga yimtsüngtem nung aonunga ghonda tali mapa inyaktetsü aser yimtsüng rongsenkettzüng jenjang tajungba akümtsü, ta paisa metetdaksü.

Iba project atema nodal agency ji Punjab Energy Development Agency asütsü. Parnoki solar streetlights tasen inoktsüba dang masü saka tang aliba tejentema yanglutsütsü mesüra tasen melentsütsü, ta minister-isa metetdaksü.



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 13, 2026


Ochimashi anema raratsüba ya tasak!

Aueri auer melamelaa putettsüa akok saka aueri auer memerenshitettsü, kechiyong özüng liaka auer dak auer merenshitsüsa pa jakla aser mapa agi temsüa mali. Kasaji, shiranger kati shiranger meyaritettsü, kechiyong temulung nung yarinüa bilemaka mapa küma inyaktsüba ji tasak. Iba amaji Nagaland nung, talisa asen nübortem rongnung ochimashi inyakba indang kanga jembir, saka ochimashi inyakba mapatem tuteta sayuaka ochimashi mapatem anema kanga sashia jembir nübortemi ochimashir bushia pudaktsüba, merenshiba aser menokdaktsüba osangbo tak ta mangashir. Tatsüba agi, asenoki angatettsü atema, tawa India nung Medical azüngtsü purtem atema NEET tatidang agibaren nung tatidang magidangyongi karibo tasüngdangbatem metettsüsa inyakba asoshi lanurtemi longkak aita Union Education minister mapa nungi anendaktsüogo. Atangji, NEET question paper leak asüba nungji paibo tai inyaka malitsüa akok saka pa kübok inyakertemi aibenlenbaji pa kolaki abener, kechiyong paji tokolak, anungji nüngsena aser nüngsanga pai agitsü. Aser ano kasa NEET tatidang agiba maparen nung aibelenertema tepuokdak puoka lir. Iba amaji mapang mapang shia Assam nunga government nung ketdangsertem rongnung sübokrem agiba aser ochimashi mapa inyakba atema pua tepuokdak ayuba osanga angashir aser noksa nunga angur. Ajisüaka, asen lima nungbo yimkong tenüng nung aruba sen amuzüka nisung kari yimjak nung nisung ajaki ngua anüng tonga tua ki yangluyonga, aji bushia merenshitsü aser menokdaktsütsü melen, par kidang jagi asenok kar benjong amongtsü, kar tenla ki asütsü aser kar tanurtem admission sütsütsü atema sen meshii aotsü aser auyaa yangluba kiji Tsüngremi moatsüba temoatsü kümdaktsür, Tsüngrem nem tenüngsang agüja sarasademer senshitsü. Kasaji, nisung kari yimkong asoshi terenlok mapa inyaktsüba sen agi par atema ali tuluka alir alu ayimtsü aser ajia Tsüngremi moatsüba kümer özüng nem merenshidaktsütsü melen Tsüngrem nem tenüngsang agütsür yutsütsü. Aji oda, asen lima nunga RTI temeten ajanga state government kübok department balala nung ochimashi mapatem agi nübortemi meteta aser memeteti akoksadaktsüba ochimashi mapatem puteta nisung karibo nüngsen agia yimjak nung metetdaktsür, saka shingaia aji jepzüka ola madoker. Aji oda, asen lima nungbo anü mürra pua auyaba mapatem ajak ya RTI Activist-temi bushitsüla aser ochimashirtem anemajia parnokisa nokdaktsüla saka nübortembo kidang mener ayongayonga Whatsapp nung dang o tululu züluteptsü. Kasaji, asen lima nungbo state government kübok department balala nung nübortem akoksadakja ochimashi mapatem inyakba anema osangbenertemi bushisüngdanga jungkai adoktsütsüla aser ochimashirtem anemajia parnokisa inyaktsüla aser nübortembo pei kidang nungi pei bilemba tasü tait o mashimashi Whatsapp ajanga yokra, ajia tuluka ama bilemstsü. Aji oda, asen lima nung asenok ya ochimashi mapatem anema asangsang nung rarar masü saka Mobile ajanga rarar nokinketertem dang tem lir. Atangji, ochimashi mapa inyaktsüba yabo ayongayonga inyaktsüa akok, kechiyong ajibo asentzüa malu pen agidang inyaktsü saka ochimashi mapatem anema nokdaktsüba yabo mapa temela masü. Yangji nübotsük lir, pei rongsen endoktsü, nüngsen agitsü aser peibo takoksa aika angutsü. Kasa timtem jenti agia, tawa lanurtem oagi Jantar Mantar Delhi nung ita junga longkak aita amungba asenoki nguogo. Aji temela masü. Ashiko, asenokibo kenü longkak aita amonga maremtsü südi. Ibaji asenok shi agidang masü saka asenok tangatetba shisatsü aser tanela tamang agia metizüktettsü. Ibayongji, ashiko asenokbo longkak ait tenzüker ghonda 24 tsüngda aika alizüka adoktsü, party purtemi mesüzükttsü, yimer aser tzünkong purtem maden akümtsü. Iba jagi, joko tanübo pei kima, yim nem memetetdaktsüi, yimkong meyong kiojen yanglur yimjak nung semzüka sayur. Itemjii nübortem mezüngmeshiba mapa saka shibai kechi shitettsü ? Whatsapp nung dang Corruptions anema zülutepa kazüang, jungdikor !

OLEMSABANG

MENINGOCOCCAL TASHITAK INDANG TEMETETTSÜ

~ Office of the Chief Medical Officers Office,
Mokokchung: Nagaland.



Iba tashitak ya kechi?

Meningococcal Tashitak ya Neisseria meningitidis ta sür mesen (bacterium) kati adokdaktsür.

Iba tashitak ajanga timtem itemi adokdaktsür:

- * Meningitis (Tokolak aser tongtoret nung timtem)
- * Septicaemia (Azü jajaba tezü nung timtem-bloodstream infection)

Iba tashitak koma benshir?

- * Aketba aser sachiba
- * Chipa aonpo, tzü bongdang amala lemsatepa amshiba.
- * Mapang talangka külemi anasatepa kazüba mesüra aliba tesemtem, tat: hostels aser shisarijitem.
- * Nisung aika nongteba aliba tesemtem.

Item tamaitsütem tenük zünga repranga liang

- * Temang meta/runga shirangba
- * Tokolak kanga angoba
- * Tekong yakyak ta marakzütetba (neck stiffness)
- * Saktsüba
- * Tesangwa nung tenük junga melapoktetba
- * Anünüa dang aliba mesüra makmakshimakba (drowsiness or confusion)
- * Tokyimra atuba (seizures)
- * Temang teküp nung komo temerem adokba aser anemtang, iba temeremji mesamar
- * Tetsüng teben mokongmokonga akümba

Shirnok dak item tamaitsütem lia shiranger, tekaratiba nung anasatiba Hospital bushitsüla.

Komasür kümzükttsü

- * Aketdang aser sachidang teti tepang nembangang.
- * Teka mapang shia shitokang
- * Akok tashi pei osettem tangar den telemsatep
- * Taktang teti anü tesangwa aser mopung aittsüsa yuang
- * Timtem lir yakta mozüki bushiang

Yakta tashitak putetba aser anepaluba ajanga taküm kümzükttsü.

Meteta liang. Kümküma liang. Kümzüka liang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Colombia nung menoknok lendong nung Tenla ki aika raksa



Colombia nung cathedral talangtiba 'Catedral Basílica Metropolitana Nuestra Señora del Rosario' chirepdang tangokba noksa nung angur.

August 12, 2026: August 10, 2026 anepdang Colombia nung menoknok lendong tulu atalokba mapang Tenla ki-a aika raksaogo. Tasadangba 7.4 magnitude nung anokba lendong nung nisung 160 dak tali süogo. Colombia nung cathedral talangtiba 'Catedral Basílica Metropolitana Nuestra Señora del Rosario'-a iba lendong nung chirep. Taoba mapangtem nung menoknok lendong balala nung iba Tenla ki merak sai liasü. 1938 küm iba Tenla ki tesüdak mapang nunga menoknok lendong tulu atalokba mapang nunga iba Tenla ki meraksa. 1962 küm menoknok sashia anokba mapang nung iba Tenla kilem kolak nung tongshi kabo laoa liasü. Menoknok lendong tulu atalokba sülen linük tesem balala nung Arogotemi iba lendong agi kongshirtem yari tenzüka liasü. Manizales nunga El Carmen nung aliba Tenla ki ka chirep aser Diocese of Pereira nunga San José Church Tenla ki raksa. Buga nung Redemptorist missionary temi, Lord of Miracles Tenla ki raksaogo, anungji khenpiga atema iba Tenla ki shibanga atatsü, ta metetdaksü. Archdiocese of Popayán-ia El Tambo, Morales, Totoró & Caldono nung Tenla kitem aser Popayan nung Santo Domingo Arogo Tenla ki raksa osang metetdaksü. Cali nung aliba Convent of La Merced nung Augustinian Recollect Missionary Sisters-i, Tenla ki kanga mejungi raksaogo, kilem chirep aser jara kaksaogo, ta metetdaksü. Ano külen Colombia nung evangelical Arogotemi linük nung Tenla kitem raksa asadangdar. Evangelical Confederation of Colombia (CEDECOL)-i sangdong ka ajanga, menoknok agi tamajungtiba kongshiba region ana- Coffee-Growing Region aser Pacific department of Chocó na nungbo Tenla kitem raksa osang metetdaksü. Medellín nung aliba Brethren Arogo nung Pastor, Marcelo Ferreri-i, iba lendong nung par kibong aser Arogo nung züngsemtem shiranga meyiru, ta metetdaksü. Pastor Ferreri-isa, "Iba lendong ajanga Eje Cafetero tamajungba kongshi. Yangjibo kiojen aika chirep aser asürtem teimbaka iba region nungjagi lir," ta metetdaksü. Ferreri-i, iba tatalokba ajanga Arogo nung züngsemtem tamang jenjang akhangshir; Kibuba dak taliba amanger aser Pa dak taliba jenoktsü ajungmesor, ta metetdaksü. CEDECOL-i, parnoki maneni Arogotemi takoksa anguba aser teraksatsüba asadangba sülen nungdak apir teyari agütsü, ta metetdaksü.

Alima nung Yisu kürakyanglu talangtiba Armenia nung yanglutsü

August 12, 2026: Business inyaker ka aser yimtenren nung ajemoktsü tebilemba alir kati alima nung Yisu Khrista kürakyanglu talangtibaji Armenia nung yanglutsü tebilemba lir. UK nung osangbener den jembidang Armenia nung Gagik Tsarukyan-i, "Khristan yimsü ya Armenia nung maitsü tasen ka asütsü aser Yisu kürakyanglu dangji "Armenia's calling card" ta ajatsü, ta metetdaksü. Metre 101 (feet 331) talang kürakyangluji Mount Hatis tenem kolak nung yanglutsü. Iba tenem ya tzüym level nungi metre 2,500 lir. Iba tenem ya Armenia yimtiba, Yerevan nungi kilometer 25 pilar lir aser iba yimti nungia kürakyangluji kanga junga angutsü. Tawa Parliamentary election nung Tsarukyan-i vote shilem 4 den tajemba ngua liasü. Tsarukyan-i, 2022 küm nungi iba kürakyanglu tenzük aser ibaji renemba sülen tenem kolak jagi bener atutsü, ta metetdaksü. Iba kürakyanglu ajanga Brazil nung aliba 'Christ the Redeemer' kürakyanglu ajatetsü. Brazil nung aliba Yisu kürakyanglu ya metre 38 (feet 125) talang lir. Tsarukyan-i, "Alima nung Khristan linük tejentibaji ozü linük lir, anungji alima nung Yisu kürakyanglu tulutiba ozü linük nung alitsüji tim dang," ta metetdaksü. Tsarukyan-isa Noah'er rong ka yangludar aser pai ashiba agi Yisu kürakyanglu aser Noa'er rong naprong project ya kanga temeshi, ta metetdaksü.

ANOGO ABEN TSÜNGREM DEN

Alima ajak nung Arogo

Parnok ola ajaklen aser parnok o tem alima tatem tonga ao. Rom 10: 18.

Khristan yimsü ojang ana nung ratettsütsü akok: "ARUNG" aser "OANG". Mezüngbuba oji osangtajung tajaba. "Nenok tebelemer aser khu reta abener ajak Kü dangi arung..." (Mathi 11: 28). Tanabuba oji missionary ozüng "Alima ajaki oang..." (Mark 16: 15).

Küm 2000 dak tali arogo-i iba ozüngji angashia arur aser Pa o aser temeshi ozüng nung Tanela Temeshi teyari dena ibai atalokdaksütsü meranger. Aser iba nungi adokbaji tejangja angur. (Rom 10: 18).

Missionary arogo kaji taküm aliba arogo ka lir. Kidang aser tezülen shirnoki terongdak tekümtet osang mangashi-i lir parnok atema Khristan-temi mebilemra arogoi iba senmang samatsür. Tangar den tanela sempettem lemsatepba ajanga, arogoji tali tashi aiter aser telung takümüji tali kümdanga akümer.

Missionary arogo nukjidong mapaji tangar dang aseni sobuba ama sobutsü, aseni inyakba ama inyaka alitsü sayutsüba masü, Khristan mission nükjidong tulutibaji temenen taidok, taküm aser tekümtet Khrista ajanga anguba sangdongtsüba lir. Iba asoshi arogoi "Ne yimli arung" ta sarasademtsüla.

Vietnam nung Montagnard nung Pastor ka küm 7 tepuokdak ayutsü



Pastor Y Nuen Ayun

August 12, 2026: Vietnam nung Montagnard nung pastor, Y Nuen Ayun küm tenet ser tesadang tepuokdak ayutsü obendang agütsüogo. Dak Lak Province nung aliba Central Highlands Evangelical Church of Christ Arogo aniba aser pastor inyakba atema yaküm October ita nung ketdangsertemi pa pua liasü. Vietnamese Communist sorkari, iba Arogo ya register masüba Arogo ka aser iba Arogo yagi linük security anema inyakba den külemi bendangertem den tesendaktep ayur, ta aitsü. Vietnamese communist ketdangsertemi, Pastor Y Nuen-i bendanglen aliba pastor A Ga den tesendaktep ayur, ta aiütsü. Pastor A Ga ya kiralongrar ka aser linük atema tsükchir ka, ta tamalen Vietnam ketdangsertemi sangdonga lir. Communist Party of Vietnam-i Khristantem, talisa Montagnard Khristantem ola madokdaksütsü atema tiyazü nung tai tongloksür. Ajioda süaka Vietnam linük nung Arogo ainer aser Tsüngrem yimli tejakleni aoer. International Christian Concern (ICC)-i sangdong ka ajanga, "Yimlibilema Pastor Y Nuen aser par kibong atema sarasademjang. Bendanglen aliba Pastor Ga atema sarasademjang aser Central Highlands of Vietnam nung aliba Montagnard Khristan lenirtem aser Arogo nung lenirtem atema sarasademjang," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Züngma**

(v) tezüluba tema azüng (finish reading)

* Nisung kati Laishiba ita ka nung züngma.

Zügnü

(adj) kaket azüngtsü jangraba, kaketshidaki onüba

(interested to read, interested to go to school)

* Kaket zügnürtemi school zügnür.

OLONG PAITEP # 7596

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___ i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7595 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa, 15. Putir,
16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Pyrotecnico-i Salute to America: The Nation's 250th Birthday Fireworks Celebration nung largest fireworks display asüba Guinness World Records-i agizükogo.

Pyrotecnico-i Freedom 250 organization den yaritepa July 4, 2026 nü Washington, D.C nung aliba National Mall nung record-setting show lighting süteta liasü. Iba ya United States of America 250 buba tasoba anogomung nung liasü aser parnok minute 40 nung pyrotechnics 840,537 tashi sayua liasü.

14th August aonung 'Miss Mokokchung 2026' shimba sentong akatsü (Kongrolar parnok 11-i Miss Mokokchung kurang asoshi tokteptsü)



Miss Mokokchung 2026 ayonger Forerunners Mokokchung zungsemtem den 2025 Miss Mokokchung takoker par asem, aser Show Director Khamo, Hotel Magnus nung press conference akadang tangokba noksa

Mokokchung, 12th August, 2026: "Miss Mokokchung 2026" shimba sentong 14th August, 2026 aonung 6:00 ako nungi tenzüka Mokokchung town hall nung akatsü asoshi mazüngi mapa lemsar inyadkaki, ta tayonger Forerunners Mokokchung Patron Sashinungla Nathan-i Bodbarnü yangi Hotel Magnus nung osangbener senden ka akadang sangdongogo.

Taküm iba sentong ya Beauty and Aesthetics Society of Nagaland (BASN) tawabangba nung ayongzüker. Taküma Miss Mokokchung kurang den first runner-up aser second runner-up shimsü. Iba den külemi sub-title senpet - Miss Talented, Miss Beautiful Skin, Miss Perfect 10, Queen of Hearts, Miss Runaway, Miss Photogenic, Miss congeniality aser Miss Beautiful Smile itemji shimsü ta laisa lemsatep. Taküm iba tetoktepba nung tobur tajung kongrolar parnok 11-i shilem agitsü aser parnokji arishi küm 18 nungi 22 tsüngta alirtem lir.

Tetoktepbaji round asem nung ajemdaker tetendangba agitsü. Mezüngbuba round-ji traditional aser iba round nung kongrulartem metetpelaba mapang alitsü, tanabubaji designer cocktail alitsü

aser iba round nung Manen Jamir-i designed asüba sobutsü balala sayutsü, aser tasembuba evening gown round nung HM Hpuangmawii-i-i designed asüba sobutsütem sayutsü, ta '2026 Miss Mokokchung' Show Director & Talent Foresight Co-founder, Neitho Khamo-i metetdaksü.

'Miss Mokokchung' kurang shiba ajanzükdir, labo 'Miss Nagaland' tetoktepba nung indang-indanga shilem agitetsü. Iba den 1st Runner up aser 2nd Runner up angurjia Miss Nagaland tetoktepba nung shilem agitsü atema tetendangba (audition) agitsü maangka agütsütsü, ta paisa ashi.

Taküm agi kümnabuba Miss Mokokchung ayonga arudang, Mokokchung nung sempet aketer kongrulartem jenti angur, anungji, tejakleni arua beauty pageant/industry nung ya shilem agitsüla. Iba tsütsü ngujem lir aser nisung aika takok tajung ngua odaki, aser Mokokchung ya iba luyimba nung nukla tulu angur, anungji, atsüayong makai shilem agitsü asoshi paisa ayongzü.

Covid-19 ajanga alima mesüngjemi kümer küm asem tashi Miss Mokokchung shimba

sentong ya mekateti liasü, saka iba ya akatsü tim ta yimdangi arua Forerunners Mokokchung-i yaküm 2025 nungi iba sentong ya asendenshia ayonga arudar.

Iba aonung tereprangi arurtem tezü matangtsü ta bilemer, kechiaser tawa tanü nüburtemi nüngtugu süa tetshir rogo - Sariwar band, Ningdangri & Friends, Shau Evans, Elizabeth Khing, Tiakümla, Maongkar, Toshiwapang Imsong parnok ken aser kongki balala ajanga tesentepertem longsodaktsütsü renemdar.

Sentong nung Mokokchung DAO, Dr. Lanunochetla Special Guest aser Sashila Ozüküm Guest of Honour asütsü jaok lir. Ticket jenjang telemsa yamai alitsü - Rs 300/- (General), Rs 2000/- (Donors) & Rs 5,000/- (Premium). Ticket jilia alinürtemi Social Garden Restaurant nung angutsü aser 14th August aonung town hall nunga angutsü.

Iba sentong nung Miss Mokokchung 2025 - Bendangienla, first runner-up - Temsulila Longkumer, second runner-up - Putusenla Aier, Forerunners Mokokchung züngsem Purtula parnokia shilem agia jembi.

Arunachal Pradesh-i gari auyaba network ka makdokogo

Itanagar, August 12, 2026 (Agencies): Arunachal Pradesh-i Kra Daadi district nung gari tajung 15 aser Itanagar Capital Region nung scooters 10 tashi nguteta vehicle theft ken o ana koktetogo.

Kra Daadi nung police-i interstate racket ka makdok. Iba telok yagin gari tajungtem auya aser iba sülen yokdok. Iba ken o dak sendakba nung nisung pezü apu aser gari 15 ngutetogo ta Superintendent of Police Sepraj Perme-i ashi.

Deputy Superintendent of Police Mape Zirdo lenisüba kübok Special Investigation Team (SIT) ka tenteta iba vehicle theft network bushisüngdanga aru ta SP Perme-i ashi.

Par pezü ya Zahangir Alam, Mojhibur Rahman, Mohammad Sablu aser Md Gargantuan Ali nunger ta jangjaogo aser parnok ajak ya Assam nung alir.

Iba maparen nung Alam ya tetsüdi liasü aser pa Assam kübok Barpeta nung apu ta police-i ashi.

Iba telok yagi Delhi-NCR region nungi gari tajungtem auya aser iba sülen Arunachal Pradesh o Nagaland-i bener arua yokdok. Iba syndicate yagi gari tajung alinürtem dak tenük yoka mapa inyak aser tatalokba kar nungbo kecha memetetba nisungtem account tem amshia senotsü benshi.

Kra Daadi ken o koktetogo aser chargesheet ka benokogo ta Arunachal Pradesh police-i ashi.

Itanagar nung tanga tatalokba ka nung police-i auya bener aoba scooters 10 ngutetogo aser iba dak sendakba nung tanur pezü puogo.

Iba ajanga Itanagar Capital Region aser Assam kübok temeket nung two-wheeler theft network ka inyaksangshiba putetogo.

Itanagar nung Zoo Road

nungi scooter ka auyaba ken o ka Chimpu Police Station nung benokba sülen bushisüngdang tenzüka liasü.

Police-i security checkpoints nung mita atadang Child in Conflict with Law (CCWL) kati auyaba scooter ka anir aoba sot. Iba tanur dang asüngdangya asüdag iba tesem nung tanga garitem auyaba osangtem angu.

Kuli balala nung ajemdaker Chimpu Police Station Officer-in-Charge Inspector N Nishant-i anir police telok kati bushitepa aodang Assam kübok Gohpur nung auyaa bener aoba scooter pungu angu.

Kasa mapang Sub-Inspector Taba Tate-i aniba telok kati Ganga village nung scooter pezü tashi apu.

Iba two-wheeler theft network dak sendakba nung CCWLs pezü puogo aser maneni bushitepdar ta police-i ashi.

US-South Korea drill tenzüksü lia North Korea-i missile ka khaketa yok

Seoul, Luroi/August 12
(Agencies): North Korea-i Bodhbarnü Korean peninsula anütok tziküm leni ballistic missile ka khaketa yokogo, ta South Korea aser Japan nunger ketdangsürtemi ashi.

Seoul aser Washington na
tongtibat military exercise
tem ayongzuka agitsü anogo
ishika lia North-i tang iba
missile khaketa yokogo. Linük
ana longjemer military exercise
balala agiba ya Pyongyangi
anema arudar.

Missile ya North kùbok Wonsan tesem nungi anepdang 6 ako shi nung khaketa yok, ta South Korea indang Joint Chiefs of Staff (JCS)-i ashi. North Korea-isa anogo trok tejakdang kasa tesem nungi ballistic missile ka khaketa

yokogo.
South Korea aser U.S. na
Ulchi Freedom Shield ta
nūngja agütsür military drills ka
August 17 nungi 27 tashi
ayongzüka agitsü lia iba
missile khaketa yokogo.
Prongyang-i nuclear aser tang
hadir balala yanglua
tendangba atema telangzüba
agütsütsü nükjidong nung item
drill tem ayongzüka agir.

Seoul nung Korea Institute
for National Unification nungi
bushisüngdang Hong Min-i
ashiba agi, tang missile
tendangba ya North Korea
indang weapons development
sentong nung shilem ka asütsü
akok, saka tang tendangba
ajanga exercise magi tsünga
osang ka agütsütsü asoshi iba
mapang shim asütsü ta bilemer.

Missile khaketa yokba dak sendakba nung North Korea-i kecha telangzüba magütsü, saka Pyongyang-i Bodhbarnü South Korea aser Japan na nuclear hadir yanglutsü atema tejangraba aliba aitsüogo.

South Korea-i ashiba agi,
North-i August 6 nü ballistic
missile ka khaketa yokogo,
saka Pyongyang-i iba indang
memetetdaksü. Hong-i ashiba
agi, tetendangba ya takok
mongutet asütsü akok.

North Korea-i taküm short-range ballistic missiles, artillery rockets aser tanga tactical hadirtem aika tendanga arudar.

Bodhbarnü tendangba densema 2026 küm North-i ballistic missile 11buba tendangogo, ta South Korea-i ashi.

EU-i ozü rong dakenük yokra onokia kasaji inyaktsü: Putin



saka asenoki nüngdak aser tim
ta bilemba tesem ajunga nung
inyaktsü."

Russia indang Pacific Fleet commander Viktor Liina-i Putin dang, Britain aser France ama tsükchir linük temia 'flags of convenience' amshiba rong temnung osettsüset abener - aser EU aser Britain nunger oshi amshiti süra, itemjia "shadow fleet" ta ashitsü akok, ta ashi.

"Anüolen linük temi pei
jangraba ama osettsüset
abentsü atema 'third countries'
tem indang nisan songa aliba
rong tem amshir. Anungji item
ta shadow fleet akumer," ta
Liina-i Putin dang ashi.

"Tembar masüba linüktem
meyong rong tem aser parnok
indang shadow fleet tem
semdangtsü aser aputsü asen
dak tashi lir; inter-agency
coordination yua lir, aser item
mapa invaktsü onok renema lir."

Par fleet ajanga Asia-Pacific region nung maritime traffic tejanga asadangogo aser lenmang tem, oset aser rong kiburtem meteta lir. ta pai ashi.

Putin-isa Asia-Pacific region
nung NATO dak amokmeren
yimya lir aser Arctic nung
mangatetep adokdaksür ta tai
tongloksü.

Moscow, Luroi/August 12 (Agencies): European linük temi Russia merchant vessels tem apu tenzükra Russia-ia kasa mera agitsü, ta Russia Tir Vladimir Putin-i Bodhbarnü ashi aser Russia indang Pacific Fleet tanishir-ia bendanger rong tem repranga aputsü par sepaitem renema lir ta ashi.

European Union-i Russia indang 'shadow fleet' nem telemtsü tali agüja rong noklang aika nem sanctions agüja aser rong kar aser yangji rong ketdangsür tem apuba mapang ka nung Russia indang far east tsütsü navy drills reprangba mapang Putin-i iba o ya ashi.

Sanction paidoker ta
temulung melemi aliba rong nem
anema 'maritime enforcement'

tesashiba agütsütsü atema
lenmang bushitar ta European
sorkar kari ashir.

"International maritime law
anema linük kar indang
ketdangsür temi asen 'economic
operator' indang rong tem
senzüba nokdangtsü merangba
asenoki angur... aser tawa ang
alakteta oa rong tem aputsü
lenmang bushiba aser asen ket
nungi rakzüka osettsüset
ayoktsü asadangba asenoki
ngua lir," ta Putin-i ashi.

"Yimya agi iba ya 'piracy' aser auyaba den sako lir. Aser iba ya mapa kuma inyak tenzükra, asenokia kasa yimya nung telangzüba agütsütsüsa akumtsü. Aser aji asen meyong rong tem meita aotsüba tesemtem kisüng nung masü,

Zimbabwe nung rong ka meküpok; nisung 15 asü

Harare, Luroi/August 12 (Agencies): Zimbabwe kùbok Kariba awatsüing nung nisung tali mena aliba rong ka meküpokba sülen nisung 15 süogo aser 27 samar bushidar, ta linük Civil Protection Unit-i metetdaksü.

Rong ya Mongolbarnü
tzüsem tesashi ka dak
kongshiba sülen meküpoka
liasü, ta agency yagi ashiba den
nisung 77 bo kümzükogo, ta

shisem.

Rong ya Kariba aser
asetkong balala aser angopuba
camp tem tsünga nisungtem
anir senzüba rong ka liasü,
saka meküpokba mapang
nisung tali mener liasü. Rong
nung nisung 90 dang amentsüla
saka iba dak tali mener liasü,
ta Civil Protection Unit-isa
shisem.

Rong nung passenger aser
crew kwi mena liasü iba indang

mesangdongi lir, aser agency
yagi ashiba agi, ticket ayokba
asadangba sülenang jangjatsü,
saka rong nung passenger 114
aser crew pongu mena alibabo
jangjaogo.

Ticket agitsü asoshi arishi
küm agi matonga tanurtema
aika mener liasü asütsü akok,
ta agency vagi ashi.

Zimbabwe indang national
police service-i ashiba agi,
taküm alirtem kümzüksü asoshi



OFFICE OF THE
MOKOKCHUNG SENSO MUNGDANG
 Mokokchung Village



Ponen Longkumer



Moakumzuk Jamir

Mokokchung Senso Mungdang Office ajanga **Sp. Ponen Longkumer** S/o Lt. Lanusowa Longkumer aser **Sp. Moakumzuk Jamir** S/o Wb. N Bendang Jamir nati NPSC-2/NCS-2025 tatidang nung Department of Rural Development, Government of Nagaland kübok BDO/RDO/APO (Class-I Gazetted) jenjang tulu ajangzüktetba atema khonang tetushi agütsür.

Tsüngremi nenen nena nem shisatsü aser taküm tajung moajang ta yimer yimsanger ajak sarasadem.

Sd-
(L. Kari Kichu)
President

Sd/-
(T. Lipoyanger Pongen)
Secretary

Mokokchung Senso Mungdang

Mokokchung Senso Mungdang

OFFICE OF THE
CITIZEN CLUB LONGSA
Hq- Longsa, Mkg-798601

TENÜNGSANG AGÜTSÜR

Wb.Supongmey i aser Wt.Moanaro tena jabaso Sb.Wapangtemjen Ao, pai NPSC ajanga agiba NCS, NPS & Allied Services 2025 tatidang nung Inspector of Industries/Economic Investigator (Class-III Non Gazetted) under Industries & Commerce Department, takok tajung ngutetba asoshi asen Citizen Club sangeri tenüngsang agütsür.

Asen Teyanglur Tsüngremi ne wadang ano maneni moaja len aniangma.

Sd/- Sp. Arensosing President Citizen Club Longsa	Sd/- Temjenyongla General Secretary Citizen Club Longsa
--	--

SANGDONGER

Mr Imnasanen Jamir Akhoya aser Kinungtsü Mrs. Chubayangerla Longkümer Akhoya tena nem kari danga sen aputsüra aser Ali kimong-lumong, tzümo-omo item amala tezülutepba nung shiri sen aputsüdir taputsür khuret asütsü. Item nung onok Nokenlemba nungi jakzükba chirnurtemi khuret kecha mabentsü aser memetet ta iba tezüluba ajanga ajak dangi sangdonger.

Dated 12/8/2026

*Kinunger ajak tenüng nung
Rongsenkaba*

REGD NO. 327/Pn. 8 /
DATE 11/8/2024

 **NAGALAND**

AFFIDAVIT 04AA 130052

I, Smti. **NUKMENNARO AIER @ WEKHROU MERO**, Wifc of Late Wezhietsu Mero, aged about 68 Years, resident of H.No-288 Niamthuri Village Dimapur, Nagaland, do hereby solemnly affirm and declare as follows:

1. That I am a citizen of India and an Indigenous inhabitant of Nagaland
2. That, in my Aadhar Card bearing card no- 5381 0361 2227 and Birth certificate my name is entered and recorded as **NUKMENNARO AIER**. And my father's name in my birth certificate is entered as **MAONG AIER**
3. That, whereas in my PAN card bearing no- **EEBPM4257Q** my name is entered as **WEKHROU MERO** and my father's name as **MAONGKABA AIER**.
4. That, this affidavit is made to declare that the names **NUKMENNARO AIER** and **WEKHROU MERO** is my name and of the same person and **MAONGKABA AIER** and **MAONG AIER** is my father's name.
5. That, this affidavit is declared so as to rectify my name in my PAN Card from **WEKHROU MERO** to **NUKMENNARO AIER** and my father's name from **MAONGKABA AIER** to **MAONG AIER**
6. That, henceforth, I shall use my name as **NUKMENNARO AIER** and my father's name as **MAONG AIER** for all official purposes and references.
7. That I do state and verify that the statements made above are true and correct to the best of my knowledge and nothing is false.

DEPONENT

Solemnly declared before me by the deponent on this 11th day of August 2026 at Dimapur.

NOTARY PUBLIC

maneni inyaktepdar.

State broadcaster ZBC-i, speedboat tem rong ka meküpoker aliba leni aoba aser helicopter ka iba temeket nung yimzúa aliba video ka sayuogo. Maneni tzü telungi airtem yoka teküzmükba maparen balala inyakdar, ta kasa sangdong ajanga metetdaksü.

Tenük kuli agütsür Maxton
Kanhema-i AFP news agency
dang ashiba agi, iba rong va

tsüngsang majungba mapang
apuso aser tzüsem yagi rong
dak kanga mejungi kongshi
asütsü aser iba ajanga engine
mapa minyaki aküm asütsü
südi.

Kariba awatsüng ya Zambia
den Zimbabwe arrtsü nung
linük yimtiba Harare nungi
km300 shi pilar lir. Iba ya
nisung-i yangluba awatsüng
tulutiba lir, koba Zambezi ayong
nokdanga yangluba lir.

India-Afghanistan T20I asayamung Delhi nung asayatsü



Luroi/August 12, 2026

(Agencies): Afghanistan-i ayongzüka India den Arun Jaitley Cricket Stadium, Delhi nung September 13 nungi 17 tashi nung T20I asem asayatsü ta Afghanistan Cricket Board (ACB) aser Board of Control for Cricket in India (BCCI) nati metetdaksüogo.

Iba asayamung ya September 13 nü tenzüksü aser tanabuba T20I asaya ya September 15 aser tasembuba September 17 nü asayatsü. Asaya asemprongla kasa tesem nung dang asayatsü.

Iba asayamung ya Afghanistan indang tarutsü nung Tour tem atema sentong nung shilem ka lir aser India nung

asayatsü kechiyong kümtem tsüngda Afghanistan-i home fixtures tem neutral tesemtem nung ayongzüka asaya arudar.

Iba asayamung ya India aser Afghanistan na tsüngda tanabuba bilateral T20I asayamungang asütsü. Team ana ya 2024 küm January ita India-i ayongzüka Mohali, Indore aser Bengaluru nung asayaogo. India-i iba asayamung akok.

Taruba asayamung ya India T20I team asoshi tongtibatang mapang ka nung asayatsü, kechiyong captain Shreyas Iyer kübok parnok junga masayateti arudar.

India team-i tawa Ireland den asaya 2-0 agi makok aser

iba sülen England 4-0 agi mekoki liasü. Iba sülen Zimbabwe den asayabo 3-0 agi kokogo.

Maneni iba asayamung ya Asian Games asoshi India squad shimtsü atema tongtibatang asayamung ka asütsü. Asian Games masaya tsüngda Afghanistan den asayaba ajanga team combinations asadangsü aser asayartem asayashia atatsü asoshi maongka agütsütsü.

2026 Asian Games ya Aichi Prefecture, Japan nung September 19 nungi October 4 tashi asayatsü.

India-i Asian Games atema T20 squad sangdongogo aser Afghanistan dena kasa asayartem dang asayatsü imlar.

Asian Games atema India squad:

Shreyas Iyer (capt), Sanju Samson (wk), Abhishek Sharma, Ishan Kishan (wk), Shivam Dube, Tilak Varma (vice-capt), Axar Patel, Washington Sundar, Nitish Kumar Reddy, Varun Chakravarthy, Ravi Bishnoi, Harshit Rana, Arshdeep Singh, Vaibhav Sooryavanshi, Jasprit Bumrah.

India den Test atema Sri Lanka squad sangdongogo

Luroi/August 12, 2026

(Agencies): India den Test ana asayatsü aliba atema mezüngbuba Test asoshi Sri Lanka Cricket (SLC)-i asayar 16 tenüng sangdongogo. Squad nung wicketkeeper-batter tejen Niroshan Dickwella-a züngoksema lir.

Dhananjaya de Silva team captain asütsü aser Kamindu Mendis vice-captain asütsü shimogo. Kusal Mendis yiruba ajanga mezüngbuba Test masayatetsüsa akümba sülen Dickwella ya wicketkeeper ama shimogo.

Mezüngbuba asaya atema Batter Pathum Nissanka-a meshim. batter tem rongnung Lahiru Udara, Nishan Madushka, Dinesh Chandimal, Pasindu Sooriyabandara aser Sonal Dinusha nunger densema lir.

SL team nung specialist spinners Ramesh Mendis, Prabath Jayasuriya aser Keshara Nuwantha nunger lir aser pace department nung

Milan Rathnayake, Asitha Fernando, Lahiru Kumara, Vishwa Fernando aser Dilshan Madushanka nunger densema lir.

Mezüngbuba test ya Galle International Cricket Stadium nung August 15 nungi 19 tashi asayatsü. Test ana asayatsü aliba ya ICC World Test Championship 2025-27 cycle nung shilem ka lir.

Shubman Gill-i aniba India team ya World Test Championship rankings nung tang pongububa nung lir aser Sri Lanka trokbuba nung lir.

Sri Lanka squad: Dhananjaya de Silva (captain), Lahiru Udara, Nishan Madushka, Kamindu Mendis (vc), Dinesh Chandimal, Pasindu Sooriyabandara, Sonal Dinusha, Niroshan Dickwella (wk), Ramesh Mendis, Prabath Jayasuriya, Keshara Nuwantha, Milan Rathnayake, Asitha Fernando, Lahiru Kumara, Vishwa Fernando, Dilshan Madushanka.

Canadian Open: Rybakina-i Osaka koka semifinal tongtetogo



Luroi/August 12, 2026

(Agencies): Canadian Open quarterfinal nung second-seeded Elena Rybakina-i asaya mekoki aliba nungi meyipa tur Naomi Osaka 4-6, 7-6(5), 6-4 agi koka semifinal tongtetogo.

2022 Wimbledon aser 2026 ?Australian Open champion Rybakina semifinal nung fourth-seeded asayar Coco Gauff den asayatsü. Belinda Bencic

yiruba ajanga masayatetsüsa akümba sülen Coco Gauff ya semifina-i iogo.

Osaka aser Rybakina na tour-level nung mezüngbuba asayaba mapang Japan tsürla yagi asaya kanga junga tenzük aser mezüngbuba game break asüba sülen mezüngbuba set ayong yonga koka liasü.

Tanabuba set nunga Grand Slam pezü koker alila ya 4-2 agi

tejakdang aküm, saka Rybakina-i kanga junga asaya-a tena kasasa aküm aser tiebreaker asaya koka decider asayatsüsa aküm.

Tasembuba set nung Kazakh tsürla yagi break points pezü tashi kümzüik aser Osaka indang serve break süa asaya koka liasü. Tena tsüngda ghonda ana ser minute 33 asaya.

Mongolbarnü tanga asaya ka nung Gauff ball nung khen danga mezüki takok nguogo, kechiyong Bencic yiruba ajanga quarterfinal nung masayatetsüsa aküm. Iba ajanga Gauff anisüngzüksü asoshi mapang talangba agütsüogo.

2023 ?US Open champion ya la indang career nung WTA 1000 semifinal 16bubai iogo. Lai taküm title ka danga bena mali, aser mezüngbuba title abentsü atema meranga asayadar.

Gauff ya Miami aser Rome na nung tanabuba jenjang nung tembang aser Wimbledon nunga semifinal nung tsüka liasü.

Gauff aser Rybakina na taoba mapang 2022 küm khen dang asayar lir, aser ajia Toronto nung asaya liasü, koba America tsürla yagi set asem asayaba sülen koka liasü.

Crystal Palace-i Guessand den tenangzüktepba yanglushi



Luroi/August 12, 2026

(Agencies): Crystal Palace-i Aston Villa nungi Evann Guessand den ano season ka asoshi tenangzüktepba yanglushiogo. Pa season tepeyong loan nung oa asayatsü.

Arishi küm 25 tain Ivory Coast nunger forward ya taoba season tesadang ka Selhurst Park nung asaya aser May ita Conference League akokba team nung densema liasü.

Pa taoba küm August nungang Villa nung pound million 26 yong aden aser season tetenzüklen junga masayateti tetoktepba ajak senteper asaya 21 nung goal ana dang idakja liasü.

January ita Palace-i aoba sülen Guessand-i Wolves pur goal 1-0 agi akokba asaya nung

Premier League nung mezüngbuba goal idakja liasü. Conference League final nung Spanish club Rayo Vallecano akokba asaya nunga pa asaya liasü.

Pa taoba season Europa League winner's medal ka ngur tembangogo, kechiyong pa season tetenzüklen Villa nung asaya aser Unai Emery-i aniba club yagi iba asayamung koak liasü.

Taküm World Cup nung Guessand Ivory Coast team nungi substitute ama anaben asayaogo.

Tang transfer window tetenzüklen Palace puri pa atema tenangzüktepba meyanglutetba sülen pa pre-season atema Villa-i meyipa oa liasü.

BILEMDANGANG

"Nai kecha memetet ta metetbaji dang ochi shisatsüji lir."